

RAPIITAIRO PABLO ROSANKENATZINIRI TIMOTEO

Wethataantsi

¹ Naaka Pablo osankenatakaantzirori jiroka. Rotyaantaperore Jesucristo ninatzi, iriira Pawa kowakaakenawori nonkenkithatakotairo ikantakairi pairani, rañaakagai Cristo Jesús. ² Eeroka nosankenatzini Timoteo, nokemetakaakemi eerokame netakotane notomi. Onkaminthia ineshironkataimi Ashitairi Pawa eejatzi Awinkatharite Jesucristo, onkaminthia retakotemi, piñaantyaawori pisaike kameetha.

Pinkenkithatakotairi Cristo

³ Ari nokantapiintatyaa tsireniriki eejatzi kiteesheriki namanakotzimi, niwetharyaari Pawa, nantawaitainiri, noshiyakotaari ikantaga pairani nocharineeteni tampatzikashire rinake. ⁴ Arika noshiretyaawo piraawaitaganki, osheki nokowake napiitairo noñeemi, inantyaari nonkimoshirete. ⁵ Osheki nokenkithashiryaakotakemi poshireperotantanakari. Tema iro etanakawo pisawo Loida, opoñaanaka pinaanate Eunice. Niyotzi eejatzi ari pikantanakari eeroka. ⁶ Irootake napiitantemiri nonkantemi: Papiitairo powakeratairo okaatzi ritasonkawentakemi Pawa notzimikapatziitontakemiro pairani nako. Poshiyakagairo roonthotaitziro paampari

itsiwakimaterika. ⁷ Tema Pawa te ithaawashire-takaantzi. Apatziro ishintsishiretakaantzi, retakoshiretakaanta, ifñaakoshiretakaanta.

⁸ Irootake eero pikaaniwentantawo pinkenkithatakotairi Awinkatharite, poshiyena naaka, eero pikaaniwentana romonkyaawentaitanaria Pawa. Iriitakera shintsishiretakaimine poshiyena naaka, nokemaatsitakowentakawo Kameethari Ñaantsi. ⁹ Irijatzi owawisaakoshire-tairi Pawa, iri yoyaayetairi tasorentsishire ankantaiya. Te aaka antashityaawone apaniroini, iriira kowashitakawo rantero. Rashi rowaatziro pairani Pawa ikowakaakeri ineshironkayetai Cristo Jesú. ¹⁰ Iroowa rantakeri ikoñaatakera pairani Owawisaakotantaneri, Cristo Jesú. Iriitake matakerori roitsinampairo kaamanetaantsi, rookapaintairo Kameethari Ñaantsi, iro ayotantaari rashি rowaatyeero rañaakaayetai. ¹¹ Irootake rowantakenari naaka Otyaantaperori, rotyaantakena nonkenkithatakaante, onkene niyotaayetairi kaari nosheninkata. ¹² Iro opoñaantari nokemaatsiwaitawo iroñaaka. Iro kantzimaitacha te nokaaniwenta. Niyotzi naaka iita noshiretaari, niyotzitaari oshekitzimotziri ishintsinka eero ripakaakaanawo ikowakaakenari nantainiri irojatzi paata kiteesheriki ripiyairika. ¹³ Arira pinkantaiyaari eeroka, poshiyakotenawo jimpe okanta pikemakena nokenkithayetake, piyaatakayero poshiretya. Etakotane pinkantante, iroowa rantapiintanairi rashiyetaari Cristo Jesú. ¹⁴ Tema risaikashiretantakemi Tasorenkantsi, iri kyaaryooshiretakaimine

eero pipakaantawo irooperori ikowakaakemiri piyotaantero.

¹⁵ Pikemakotakena eeroka tsika okanta rookanawentakena Asia-satzi. Jirikapaini: Figelo eejatzi Hermógenes. ¹⁶ Iri kantacha Onesíforo, osheki roimoshirenkapiintakena irirori, te ikaaniwentana roosoweetakenaga. Antawoite nokowi ineshironkatairi Pawa ikaatzi saikapankotziriri. ¹⁷ Tema iri kowakowatapaakenari rareetakaga Roma-ki, irojatzi iñaantapaakena. ¹⁸ Iri Awinkatharite neshironkatairine paata kiteesheriki ripiyairika. Tema piyotaiyini eeroka, osheki ramitakotakena Onesíforo nisaikantakari Efeso-ki.

2

*Poshiyakayaame eerokame rowayerite
Jesucristo*

¹ Notomí, tema iri neshironkataimi ketziroini Cristo Jesús, ontzimatye pintontashiretai.

² Pikemakena jimpe okanta niyotaantake atzirikipaini. Ontzimatye piyoyaayete tsika inkaate iriiperoshiretsine iri matanairone riyyotagairi itsipa. ³ Aamaawenta pinkantya patsipewentaiyaari Jesucristo. Poshiyakayaame eerokame rowayerite. ⁴ Ikaatzi owayeritachari tera iñagaitziri rantayetanairo antawairentsi rantapiintaitziri kiteesheriki. Apatziro retapiintawo rantayetziro ikantziriri iyorakate.

⁵ Ontzimatye poshiyakotyaari eejatzi ripinataitziri anaakotawakaachari rishiyaiyani. Tema antawoite iñaashintsityaawo. Rimatantyaa-wori ranaakotante ontzimatyeera iñaantzityaawo

ketziroini. Irooma inthaiyawaitashitakyaarika ranaakotante, eeromaita ripinaitziri.
 6 Ontzimatye poshiyakotaari eejatzi pankiwaintziri. Tema iriitake etapiintawori rowawo iwankire. 7 Pinkenkithashiryaakoterowa nokantayetakemiri. Tema iriitake Awinkatharite kemathatakaaperotemirone maawoini.

8 Pinkenkithashiryaakoteri Jesucristo icharinetakari David-ni. Tema añagai irirori ikamawetakaga. Iroowa Kameethari Ñaantsi nokenkithatakotairi. 9 Irootake natsipetantawori iroñaaka naaka, noñaantakawori roosowaitaitana romonkyagaitakena, roshiyakagaitakena naakame tsitokantzinkari. Irooma riñaane Pawa eero rimaitziro roosoitero iroori. 10 Irootake nokisashitantakawori maawoini jiroka, okantakaantziro netakotari ikaatzi riyoyaayetairi Cristo Jesús, rowawisaakoshiretairi iñaantaiyaawori kantitaachane añaamentotsi, owaneenka onkantaiya. 11 Jirokaga irooperori ikantaitziri:
 Arika ankamakotairi Cristo, ari antsipataiyaari rañaakaayetai.

12 Arika ankisashiwainetakya, ari antsipataiyaari ampinkathariwentantai.

Irooma arika ankante: “Te niyotziri,” ari rimataitakai aaka.

13 Iro kantacha, arikame añaawetyaawo te akamai-wentaari, iriima irirori ikamaiwentakai. Ari rashì rowatziiro irirori, te ipashinitanetzi.

*Poshiyakotaari
raakameethaitziri*

antawaiyantzi

14 Piyotaantairo jiroka. Pishintsineen-takaantero ikowakaantziri Pawa: Eero riñaaanatawakaantashiiawo ñaantsiyetatsiri kaari irooperotatsine, okantzimoneentarikari inkaatera kemerone. **15** Ontzimatye piñaashintsitya potampatzikatairo ñaantsi irooperori, onkene raakameethawentaimiro Pawa. Poshiyakotyaari ikantaganki antawairentzi kaari tzimatsine oitarika inkaaniwentakoteri. **16** Pipakagairo eero ka riñaanetashiyeetari kaariperori. Ari opoñaari rithainkatasorentsitantitari. **17** Oshiyakotawo owawathatanta pathaawontsi. Iroowa awishimotakeriri Himeneo eejatzi Fileto. **18** Ikenakaashiwaitakawo irirori riyotaantziro irooperori, ikantake: “Tera aripero añaayetai arika ankamayetake. Roshiyakaawentashitaitawo ikantaitziri ‘añagaantsi’. Okaatzi roshiyakaawentatziri añagaira, irootake aimoshirenka akemakeri awentaanaarira Awinkatharite.” Tema okaatzi riyotaantashitari, ripakaakaakeri ikaatzi itsipawetari ikemisantaiyawetanira. **19** Iro kantzimaitacha, oshiyawaitakawo rowatzikatyerome Pawa irooperori itzinkami, ari riwetsikakeme ipanko. Ari rontarekakotake apite osankenarentsi, okantzi etanakawori: “Riyoyetziri Awinkatharite ikaatzi rashiyetari.” Irooma apitetanaintsiri kantatsiri: “Inkaate aakotairine iwairo Cristo, ontzimatye ripakagairo kaariperotatsiri.”

20 Iro kantacha janta antawoiteki ipanko, eenitatsi owaneenkatachari chomopaini, shipakiryaa okantayeta, kempoyaa rowayeetziro.

Tzimayetatsi eejatzi chomo riwetsikayeetziro inchato, eejatzi kipatsinaki, te ikempoyaaperotziro. ²¹ Arika ankiteshiretanai, oshiyakotanaawo chomo ikempoyaaperotziri ashitawori, ikowapiintzi rotetantyaawo. Tasorentsishirera inkantakaanai Pawa, aamaawenta ankantya antainiri kameethayetatsiri. ²² Intaina powairo iñaamatashiwitari mainaripaini, oshiyawaitakyawome pishiyapithatatyeerome. Iroowa piñaamatapiintanakya pinkameethashireyetai, oshiretane pinkantya, etakotane pinkantante, kameetha pisaiakakaantayete, pintsipayetaiyaari kiteshireri aakoyetairiri iwairo Awinkatharite. ²³ Ontzimatye pipakaayetairo piñaawaiyetziro kaari pantyaawone, ari opoñaari ikisawakaantitari. ²⁴ Irooma aakapaini rimperayetaira Pawa, te okameethatzi añaanaminthatawakagaiya. Tema ontzimatye aneshironkatante, ayimaneentai ayotaante, tsinampashire ankantya, ²⁵ jentashire ankantya ankaminaayeteri kisanneentairi, aamaa ari ripiyashiretakagairi Pawa, ari riyyotakotairo irooperori. ²⁶ Iro ompoñaantyaari roshiyakotantyaariri omaaminthaitari iwirentsi, tema Kamaari imperatariri, ishintsineentziri rantayeteniri ikowashiyetari irirori.

3

Tsikarika inkantaitya risaikaitai paata weyaantapaakyaawone kiteesheri

¹ Ontzimatye piyote, paata weyaantapaakyaawone kiteesheri antawoite ompomeentsitzimotai. ² Jiroka inkantayetaiya

atziripaini: Ineshironkakitya apaniroini, rosheñaashiwaityaari iyorikite, ishamewaite, thainkantzinkari rinaty, kaweyawaitantaneri rinaty, piyatha roweri ipaapate, te riyotziro riwetharyaanetya, thainkatasorentsitaneri rinaty, ³ eero retakonetanta, eero ikowanetzi impeyakowaitante, thaiyakotantane rinaty, eero romaatakaawo ikowashiwaitari, owatsinaantaneri rinaty, inkisaneentero kameethayetatsiri, ⁴ pithokashitantaneri rinaty, eero iñaakoneta, asagaawairentzi rinaty, iro inkowaperoteri ikowashiyetari awisanakero ikowakaawetariri Pawa, ⁵ ari roshiyakotyaarime pinkathatasorentsitaneri, rithainkeri Pawa tzmatsiri ishintsinka. Eerowa pitsipayetari eeroka. ⁶ Rimatakerowa jirikapaini risaikapankotantzi, ramatawiyetakero tsinanepaini jentashireri, antawoite inkenkithashiryakaakawo onkaariperoshirewaite, awentaayetakari jirikapaini, iro ayimawaitantakawori okowashirewaitziri iroori. ⁷ Irootake okowakowatapiintziri iyoperotero, te iyoperotzimaitawo okaatzi irooperotatsiri. ⁸ Iroowa rantakeri pairani Janes itsipatakari Jambres, te inimoteri rantakeri Moisés, ari roshiyakotakari jirika atziripaini amatawaitantaneri, te inimoshireziri okaatzi irooperotatsiri. Kaariperoshireri rinaiyini, raminaashiwaitaka okaatzi ikemisantaweta.

* ⁹ Eeromaita rimatziro, ari riyoyeetairi aminaashiwaitaga okaatzi rantziri, arira roshiyakotakaari akenkithatakotakeri.

¹⁰ Irooma eeroka, poshiyakotainawo naaka, okaatzi niyotaantziri, tsika nokenakairo, oita nokowiri, oitarika noshiretari, namatsinkawentanta, etakotantaneri ninatzi, kinatantaneri nini, ¹¹ owatsinagaarewo nini, ikemaatsitakaawaitaitakena, oshiyakawo okaatzi awishimotakenari Antioquía-ki, Iconio-ki, eejatzi Listra-ki. Tema osheki ikemaatsitakaaweetakena. Iri kantacha Awinkatharite rontsiparyaaakowentapiintaana. ¹² Ari onkantaatyeyaaari, rowatsinayettairi maawoini rashiyetaari Cristo Jesús kowanaatsiri impinkathatasorentsire. ¹³ Iriima kaariperori atziripaini amatawitantaneri eeke rimaperotatyeyaa, rashiminthatyaawo ramatawitantapiinte, rimatzitaitaiyaari irirori ramatawiiteri. ¹⁴ Irooma eeroka, kisokero powero okaatzi piyotakeri, tsika otzimi pawentaanaari. Tema piyotziro iita yotaakemirori. ¹⁵ Tema petanakawo eeni peentsitanake piyotakotairo Tasorentsitsatsiri Osankenarentsi. Ari opoñaari piyotai aritake pawisakoshiretai arika pawentagaiyaari Cristo Jesús. ¹⁶ Tema maawoini Osankenarentsiper, iri Pawa tasonkashiryakaantakerori rosanke-

* **3:8** Ikenkithashiryakoitziri “Janes itsipatakari Jambres”, sheripiyari rinaiyini, Egipro-satzi rinatzi. Tema pairani Moisés rontsiparyaaakowentantaariri isheninkapaini Israel-iite, jirika sheripiyariite ikowake roshiyakotakaari Moisés, riraantsitakairo ñaa, roñaagantake eejatzi osheki mashero.

nayeetantakawori. Iro riyotaantantaityaari, iro ishintsineentantaityaari inkaminaantaite, iro rotampatzikatantaityaari, iro iñaantantaityaawori inkameethashireete. ¹⁷ Ari iñagairo ikaatzira rashitaari Pawa riyoperotairo rantero maawoini kameethari.

4

Pinkenkithatakotairo ñaantsi

¹ Jiroka okaatzi noshintsineentemiri pantero. Riyotzi Pawa nokantzimiri, riyotzitawo eejatzi Awinkatharite Jesucristo, yakowentairine maawoini añaayetatsiri, ari ikantairi kamayetantsiri eejatzi. Tema irootaintsi inkoñaatai awinkatharitetaiyaari.

² Pinkeme nonkantemi: Okowaty piwetsikya onkene pinkenkithatakotairo riñaane, te apatziro pinkenkithatakotairo arika onkameethatzimoti, tema ontzimatye pimatero eejatzi arika pinkoweenkatakote. Arika piyotaante, ontzimatye potampatzikatante, pishintsineentante pinkaminaante, piñaashintsitante. Kyaaryoowa pithaakyaawentzirokari arika pantanairo jiroka.

³ Tema paata, eero ikowitzai inkemisantaitero tampatzikari okaatzi piyotaantayetziri iroñaaka, tema impiyotapaakya itsipa yotairine, ari raminaashiwaityaari inkantaite: “Kameethatatsi rantaitero ikowashitaitari.” ⁴ Iroowa ompoñaantyaari ripiyashitaitero inkemisantairo ikenkithashiryaayetari, ripakaanakero ikemisantziro irooperotatsiri. ⁵ Irooma eeroka, ñaakotane pinkantya, pinkisashityaawo awishimotemine poiwawaayetzirowa

Kameethari Ñaantsi, ontzimatye pimonkaatairo maawoini onkaate pantainiriri Awinkatharite.

6 Tema naaka, aamaa irootaintsi nompeyaiya, noshiyakotaiyaawo risakoitapiintziro riraitziri arika ritagaiteniri Pawa, sakotzimatakaga riraitziri. **7** Kyaaryooshire nokantapiintaka, noshiyakaakero naawyaakityeerome antawoite nomankiyantapiintaga. Oshiyawaitakawo eejatzi ari nanaakotanteme nareetya tsika iweyaa nishiye. **8** Irootake oshiyantakawori iriime Awinkatharite oyaanteroneme amanthairentsi impairiri tampatzikashiretantsiri. Tema Tampatzikashireri rinatzi irirori Awinkatharite, iri yotantapaatsine kyaaryooperorika itampatzikashireetzi, aripaite impainawo nashi naaka. Te apatziro naaka, ari inkantayetairi eejatzi inkaate kaari samaneentachane royaakoneentairi ripiyai.

Apatziro ikantaitziri Timoteo

9 Nokowaperotake pithotyaakotero tsika pinkantya pipokantyaari nisaikira naaka. **10** Tema rookawentanakena Demas, okaimashiretairi irirori isaawikisato. Jatake Tesalónica-ki. Iriima Crescente ikenakero Galacia-ki. Ari ikantakari Tito ikenake irirori Dalmacia-ki. **11** Apatziro Lucas iri saikanaintsi itsipatana jaka. Irootake nokowantari pipoke eeroka pintsipatyaaari Marcos, aritake rimatakero irirori ramitakotena. **12** Tema notyaantakeri Tíquico janta Efeso-ki. **13** Arika pipokanake eeroka, pamainawo nowewiryaaakowo nookanakeri pairani janta Troas-ki isaikira ipanko Carpo. Nokowi pamainawo eejatzi

maawoini nosankenatanewo saikatsiri janta. ¹⁴ Jirikaganki Alejandro, kotsiroimpeki oomeren-chaapiintakenari, rowasanketaatyeerira Awinkatharite. ¹⁵ Irijatzi paamayaari eeroka, tema te inimotziri nokenkithatakoyetakeri, osheki ikisaneentakotakenawo. ¹⁶ Tema owakera ragaitanakenaganki naaka risaikira pinkatharentsi nonthawetakotero okaatzi ikantakoitakenari, tekaatsi tsipatanakenane, rithonka rishiyapithatanakena. Tera nokowaatsikaitzi naaka rowasankewentaiteri jiroka. ¹⁷ Tema itsipashiretakena Nowinkatharite, iriitake ñaaperoshiretakaakenari. Iro nimatan-takawori nokenkithatakairi maawoini, iro opoñaantari ikemawaantetantakenari ejatzi kaari ashenkata. Irootake kaari rookaitantana manitzimooki rowena. ¹⁸ Iriitake Awinkatharite kempoyaawentakenari kaari rowashironkaitantana, eeke riyataakaatyero irojatzi nareetantaiyaari ipinkathariwentantzira Inkitesatzi. Ari rashи rowaitatyero irirori impinkathayeetairi. Ari onkantaitaatyeeyaani.

Weyaantapaakawori ritasonkawentantaitzieejatzi wethataantsi

¹⁹ Nokowi piwethatenari Prisca ejatzi Aquila, ari pinkantakeri Onesíforo, ejatzi ikaatzi saikawankoyetziriri. ²⁰ Iriima Erasto, ari risaikapaake irirori Corinto-ki. Iriima Trófimo, naaka ookanakeriri Miletoki, imantsiyawaitapaakitzi. ²¹ Ontzimatye pinthaakyaaate pareetantyaari nisaikira naaka tekera onkyawontsitanaita. Maawoini akantayetairi jaka “iyekiite”, riwethatzimi. Jirika

ikaatzi wethatzimiri: Eubulo, Pudente, Lino,
eejatzi Claudia.

²² Nokowake risaikashiretantaimi
Awinkatharite Jesucristo, ineshironkatanewo
rowaimi. Ari onkantaitaatyeeyaani.

**Kameethari Ņaantsi: ikenkitha-takoitziri
awinkatharite Jesucristo; Owakerari
aapatzia-wakagaantsi**

**New Testament in Ashéninka, Ucayali-yurúa
(PE:cpb:Ashéninka, Ucayali-yurúa)**

copyright © 2000 Wycliffe Bible Translators, Inc.

Language: Ashéninka, Ucayali-yurúa

Translation by: Wycliffe Bible Translators, Inc.

Ashéninka, Ucayali-yurúa [cpb], Peru

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ashéninka, Ucayali-yurúa

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

03413587-4161-5845-9f63-68583816dfcd